



REPUBLIKA E SHQIPËRISË  
AUTORITETI I KONKURENCËS  
KOMISIONI I KONKURENCËS

VENDIM  
Nr. 802, Datë 21.05.2021

**“Për dhënien e disa rekomandimeve Entit Rregullator të Ujit mbi aplikimin për ndryshimin e nivelit tarifor për ndërmarrjen Ujësjetllës Kanalizime Sarandë SHA”**

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Z. Eduard Ypi	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 21.05.2021, shqyrtoi çështjen me:

**Objekt:** Opinion/rekomandim mbi projekt-vendimin e Entit Rregullator të Ujit (ERRU) mbi aplikimin për ndryshimin e nivelit tarifor për ndërmarrjen Ujësjetllës Kanalizime Sarandë SHA.

**Bazë ligjore:** Neni 24, germa (d) dhe (f); neni 26; neni 69 dhe 70 të ligjit nr. 9121, datë 28.07.2003 “Për mbrojtjen e konkurrencës”, i ndryshuar.

**Komisioni i Konkurrencës** pas shqyrtimit të:

- Relacionit mbi aplikimin për ndryshimin e nivelit tarifor për Ujësjetllës Kanalizime Sarandë SHA,

**VËREN SE:**

1. ERRU-ja, nëpërmjet shkresës nr. 157 prot., datë 21.04.2021, kërkon vlerësimin e Autoritetit të Konkurrencës, në bazë të nenit 69, dhe 70 të ligjit nr. 9121/2003 “Për mbrojtjen e konkurrencës”, i ndryshuar, mbi Projekt-Vendimin e Komisionit Kombëtar Rregullator (KKRR) “Për miratimin e tarifave të shërbimit të furnizimit me ujë dhe largimit të ujrave të ndotura për shoqërinë Ujësjetllës Kanalizime Sarandë SHA”. Projekt-vendimi shoqërohet me relacionin shpjegues përkatës, i cili pasqyron procedurën e shqyrtimit dhe miratimit të aplikimit të shoqërisë UK Sarandë SHA për ndryshimin e tarifave të shërbimeve të furnizimit me ujë dhe mbledhjes e largimit të ujrave të ndotura, të cilat konsistojnë në unifikimin dhe vendosjen në një nivel të ri të tarifave të këtyre shërbimeve, të shitjes së ujit me shumicë, si edhe të tarifës fikse në zonën e shërbimit.

2. Bazuar në ligjin nr. 8102, datë 28.03.1996 “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, i ndryshuar, si dhe aktet nënligjore të dala në zbatim të tij, ERRU nëpërmjet strukturës së saj vendimmarrëse, Komisionit Kombëtar Rregullator, miraton çmimet dhe tarifat e shitjes së ujit, me shumicë dhe pakicë, tarifat për ujërat e përdorura dhe tarifat e trajtimit të tyre, afatet dhe kushtet e shërbimit, të ofruara nga operatorët, që sigurojnë ujë për konsum publik.
3. Bazuar në parashikimet e nenit 21 të ligjit nr. 8102, datë 28.03.1996 “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, i ndryshuar, ERRU ka miratuar “Metodologjinë për vendosjen e tarifave për shërbimin e furnizimit me ujë dhe largim e përpunimin e ujërave të ndotura”. Bazuar në këtë metodologji, shqyrtimi i aplikimit për ndryshim tarife fillon me analizën e kostove të operimit dhe mirëmbajtjes, të cilat duhet të jenë të justifikueshme, si dhe analizën e treguesve të performancës. Rritja e tarifave duhet të bëhet gradualisht në vitet në vazhdim, me kusht që çdo rritje të pasqyrohet në përmirësimin e performancës së shërbimeve. Tarifat e reja duhet të jenë të orientuara drejt kostove të justifikuar, rritjes së eficiencës, vendosjen e objektivave përkatës për përmirësimin e tyre, si edhe verifikimin e kriterit të përballueshmërisë së pagesës së faturës së shërbimeve nga konsumatorët. I gjithë procesi duhet të shoqërohet me transparencë ndaj publikut i cili duhet të informohet në një seancë dëgjimore paraprake mbi tarifat e reja që shoqëria synon të aplikojë në propozimin e saj.
4. Informacioni mbi aplikimin, si dhe Vendimi KKRR për fillimin e procedurës për ndryshimin e tarifave është bërë transparent në faqen e ERRU-së me Vendimin KKRR-së; nr. 161 prot., datë 30.12.2020.
5. UK Sarandë SHA është licencuar me Vendimin e KKRR nr. 62, datë 06.09.2018, i ndryshuar me Vendimin nr. 86, datë 04.03.2021, për të kryer shërbimin e furnizimit me ujë të pijshëm dhe largimin e ujërave të ndotura për katër në Bashkisë Sarandë që përfshin njësitë administrative Sarandë dhe Ksamil. Deri tani UK Sarandë ka zbatuar tarifat të miratuara nga ERRU sipas vendimit të KKRR-së nr. 15, datë 22.04.2015, përkatësisht për konsumatorët familjarë 52 lek/m<sup>3</sup> për Sarandën dhe 50 lek/m<sup>3</sup> për Ksamilin, për konsumatorët publikë e private 138 lek/3 për Sarandën, dhe 50 lek/m<sup>3</sup> për Ksamilin.
6. UK Sarandë aplikon për rishikimin e tarifave pranë ERRU-së duke synuar rritjen dhe unifikimin e tarifave për të gjithë zonën e shërbimit me qëllim përmirësimin e cilësisë së shërbimit ndaj konsumatorëve, si edhe duke përcaktuar objektiva të reja të treguesve kryesorë të performancës për përmirësimin e gjendjes financiare të shoqërisë dhe rritjes së cilësisë së shërbimit ndaj konsumatorëve.
7. ERRU ka shqyrtuar dhe vlerësuar informacionin mbi aplikimin për miratimin e tarifave të ndryshuara dhe vendosjen e tyre në një nivel të ri tarifar, si edhe ka miratuar projekt-vendimin përkatës “Mbi miratimin e tarifave të shërbimit të furnizimit me ujë dhe largimin e ujërave të ndotura për shoqërinë UK Sarandë SHA.”, ku miraton tarifat volumetrike të furnizimit me ujë, përkatësisht për konsumatorin familjar me një rritje prej 8 lek/m<sup>3</sup> për Sarandën dhe 10 lek/m<sup>3</sup> për Ksamilin ndaj tarifës aktuale, si edhe për konsumatorin publik

dhe privat me një rritje prej 2 lek/m<sup>3</sup> për zonën e Sarandës dhe 90 lek/m<sup>3</sup> për zonën e Ksamilit.

8. ERRU miraton në projekt vendim gjithashtu tarifatat volumetrike të unifikuara për KUN (largimin e ujërave të ndotura) për të tre kategoritë e konsumatorëve, të cilat rriten me 5 lek/m<sup>3</sup> për konsumatorët familjarë në të gjithë zonën e shërbimit, ndërsa rriten me 14 lek/m<sup>3</sup> për Sarandën dhe me 25 lek/m<sup>3</sup> për Ksamilin për konsumatorët publikë dhe privat. Përcaktimi i tarifës fikse të shërbimit është miratuar të rritet me 50 lekë/muaj për të gjithë konsumatorët në zonën e shërbimit. Me anë të tarifave që do të miratojë ERRU për UK Sarandë, kjo e fundit arrin të mbulojë mbi 100% të kostove të O&M, si edhe deri 31% të kostove të amortizimit të aseteve të saj.
9. Nga analiza ekonomiko-financiare, rezulton se UK Sarandë SHA pas riorganizimit sipas nenit 14 të Vendimit të KKRR nr. 42, datë 09.12.2015, rezulton që vlerësimi i performancës bazohet në disa tregues krahasimi të cilat janë analizuar në mënyrë të detajuar dhe konstruktive nga ERRU. Treguesit e realizimit nga UK Sarandë SHA nga viti 2019 deri më sot tregojnë një performancë të mirë, pasi UK Sarandë SHA arrin të mbulojë deri në 73% të kostove totale të operimit & mirëmbajtjes, në të cilat përfshihen dhe kostot e amortizimit dhe të shlyerjes së kredive.
10. ERRU në analizën ekonomiko-financiare të saj ka analizuar drejt dhe ka marrë në konsideratë vetëm kostot e justifikuara të paraqitura nga UK Sarandë SHA, të cilat përcaktojnë nevojat për të ardhura të shoqërisë si faktori bazë përcaktues në procesin e miratimit të tarifave.
11. ERRU në miratimin e tarifave ka zbatuar në mënyrë korrekte kriterin e Përbalueshmërisë i cili rezulton në vlerën 1.8%, ndaj 5% që përcakton ky kriter si kufi maksimal.
12. ERRU bazuar në një analizë të saktë ka përcaktuar objektivat e performancës tekniko-financiare të shoqërisë në të ardhmen në përputhje me ato të propozuara nga kjo e fundit, por duke vendosur objektiv më agresiv në drejtim të uljes së treguesit të Ujit pa të Ardhura në 48% nga 51,1 % të propozuar nga shoqëria.
13. Duke qenë se niveli i kostove totale për vitin 2020 mbetet thajse në të njëjtat nivele me ato të vitit 2019, me një ulje rreth 2%, si dhe të gjitha investimet për përmirësimin e rrjetit të ujësjellësit duhet të jenë transparente dhe të kontabilizohen në përputhje me legjislacionin mbi kontabilitetin.
14. Për sa më sipër, rekomandimet e ERRU-së ndaj UK Sarandë SHA dhe vlerësimit të Autoritetit të Konkurrencës mbi projekt-vendimin “Për miratimin e tarifave të shërbimit të furnizimit me ujë dhe largimit të ujërave të ndotura për shoqërinë Ujësjiellës Kanalizime Sarandë SHA”, janë në përputhje me ligjin nr. 8102/1996 “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, i ndryshuar,

## **PËR KËTO ARSYE:**

Komisioni i Konkurrencës, bazuar në nenin 24, germa (d) e (f), nenin 69 dhe nenin 70 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

### **VENDOSI:**

- I. T’i rekomandojë Entit Rregullator të Ujit si vijon:
  - a) Tarifat e ndryshuara që do të miratohen nga ERRU për ndërmarrjen Ujësjiellës Kanalizime Sarandë SHA, të jenë të orientuara drejt kostos së shërbimeve dhe të jenë të bazuara në parimin e mosdiskriminimit.
  - b) ERRU të kërkojë nga Ujësjiellës Kanalizime Sarandë SHA, ndarjen e kostove për të dyja shërbimet e ofruar, paraqitjen e subvencioneve të përfituara duke njoftuar Autoritetin e Konkurrencës brenda 90 ditëve për realizimin e këtij rekomandimi.
- II. Ngarkohet Sekretari i Përgjithshëm për njoftimin dhe ndjekjen e zbatimit të këtij vendimi.

Ky vendim hyn në fuqi menjëherë.

### **KOMISIONI I KONKURRENCËS**